

КНИГА - ШИНЧЫМАШ ПАМАШ

Уш-акыл пойдарымаште,
койыш-шоктышым шуары-
маште, ылыш ончалтышым
кумдандымаште книган вийже
моткоч кугу. Кызытсе кушкын
толшо тукум тидым пешыже
ок умыло, уверым гаджет-влак
полшымо дене кычалеш, лу-
даш кумылым ок ончыкто.
Российысе книгагудо-влакын
кечышт лүмеш йодышт-
машым эртарен, тунемше да
ача-ава-влакын книгам лудмо
нерген шонымашыштым па-
лен нална. Школышто тем-
лыме деч посна моло авторын
произведенийжым пеш шагал
ен лудаш кумылан. Тидым
шотыш налын, йоча-влакым
книга деке шўмандаш тўрлў
сынан пашам шуктена: ви-
кториным эртарена, книга але
герой-влак нерген кроссворд
ден сканвордым темлена. Про-
изведенийын тўналтышыж
ден палдарен, умбакыже лу-
даш да сўрет гоч палдараш
йодына. Тыгак "Юзо пасу",
"Мо? Кушто? Кунам?", "Йо-
дыш-вашмут" модыш дене
модыктена. Тидлан книгам

тўткын лудаш, тушто мо нер-
ген ойлалтмым, герой-влакын
образыштым умылен налман.
Тыге книгагудыш толаш, утла-
рак лудаш кумыландена. Кни-
гам лудмо нерген шонымашем
тыге мучашлынем.

Шочеш гына аза,

ава рўпшалын,

Йомакым шочшылан ойла.

Эн сай шомакым пелешталын,

Тудлан шижмашым пўлекла.

Йоча ужеш аважын тўсшым

Шыргыжалын палдара.

Колышталын ныжыл

йўкшым,

Изи чон дене юарла.

Вара кая гын йочасадыш,

Туштат вуча йомак тўня.

Чодыраш кая ма, але садыш,

Тўням палаш, шымлаш

тырша.

А школыш тунемаш толмеке,

Кечат ок лий тул деч посна.

Кугу лийын, кушкын

шогалмеке,

Кўлеш адак тылат книга!

Чын ойлат: "Книга - йолташ,

Улеш лач ылышын памаш!"

Санден кўлеш книгам лудаш,

Уш-акылнажым пойдараш!

Наталия ИВАНОВА